

Date – 01/03/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Chief Minister Pu Lalduhoman Zofa hmun hrang hranga awm te chu Chapchar Kut ropui taka hmang turin a sawm.
2. Chief Minister Pu Lalduhoma'n khaw thal chho zelah mi tin te fimkhur turin a chah.
3. National TB Elimination Programme hnuiai TB umbo beihpui tlakah TB vei mi 31 hmuhchhuah a ni.
4. Union Home Minister Amit Shah hovin Manipur chungchangah thutkhawm neih a ni.

<><><>

CHAPCHAR KUT

Chief Minister Pu Lalduhoma'n Kumin Chapchar Kut chu zofate inpumkhatna ti zualtu anih ngei a beisei a ti a, khawvel hmuha Mizo hnam ziarang leh ropui tak phochhuahna hun anih ngei a beisei tih a sawi bawk.

Chief Minister chuan Instagram kaltlangin he thu hi sawiin kumin Chapchar Kut chu zofa hmun hrang hranga awm te ropui taka hmang turin a sawm a, Chapchar Kut thupui Hawihhawmna chu Mizo hnam ziarang ropui tak, khawtlang nun leh inlaichinna ah bet tlat a ni a, he kut hmang hian he ze ropui tak hi chawi sana a awm theih nan mi zawng zawng tel turin a sawm a ni. (*Byte...Chief Minister...40 secs*)

Art and Culture Department bultumin kumin Chapchar Kut hi Aizawl bakah District headquarter zawng zawngah leh rampawna Mizoram House ah hman a ni dawn a, thupui atan Hawihhawmna tih hman a ni dawn a ni.

Chapchar Kut hmanna pui ber chu Aizawl lammualah March ni 6 leh ni 7 ah neih tura duan a ni a. Ni 6 ni hian Home Minister Pu K. Sapdanga chu khuallian a ni ang a, ni 7 niah Chief Minister Pu Lalduhoma khuallian a ni dawn a, Kut puala programme pawimawh dang chu March ni 3 atanga kalpui tan tur a ni.

March ni 3 ah hian Chapchar Kut pual Tlan (Kut Run) buatsaih a ni dawn a, ni 4 ah Flower Show leh Painting & Exhibition Show kalpui tan tura ruahman niin March ni 5 ah Chapchar Kut heritage tour buat a ni ang a, he mi ni vek hian Falkawn Zokhuaah Mizo Pi leh pute Nun tarlanna hun buatsaih tan a ni dawn a. A tuk ni 6-ah pawh neih chhunzawm tur niin Ni 5 ah vek hian Kut pual Handloom, Textile & Handicraft Exhibition and Food Processing & Food Court hawn a ni ang a, exhibition & food court hian ni 7 tleng a awh dawn a ni.

<><><>

HLUKHLA KUT

Lawngtlaia Hlukhla Kût hman mek chu vawiin khan Lawngtlai East bialtu MLA Dr. Lorrain Lalpekliana Chinzah, Adviser to Chief Minister chuan a hmanpui a.

Dr. Lorrain Lalpekliana chuan hnam ziaranga harhtharna chan a tul thu sawiin, hnam leh nihna a chiang thar turin kalkhawmte a sawm a. A bik takin hnam inthuamna leh tawng lamah harh thar a tul hle a ti. MLA chuan mahni nihna hriatchian a pawimawh thu tarlangin, chhungkua, khawtlang leh ram siam tha tura mahni nihna a chian hmasak a, hma lam pan zel tura mahni intiam turin kalkhawmte a sawm a. Pi leh pute rohlu- nun zemawi, rinawmna leh taihmakna chu vawng nung zel turin a chah bawk.

Thiamna lama tan lak a tul thu sawiin MLA chuan thiamna sang zawk nei turin theihtawp chhuah ni se, ziak leh chhiara hniam lam pan a hlauhawm a ti a, hnam anga theihtawp chhuah a tul a ni, a ti. Hnam ziarang leh kalphungte ziaka dah thlap thlap thin hnam an boral ngai lo tih sawiin MLA chuan Lai hnam ziarang leh tihpungte pawh ziaka vawn that reng a tul a, Laifate chu mawhphurhna la ngam turin a chah a ni.

Hlukhla hi Lai Hnam Kût lian leh ngaihhlut ber niin kum tin hman thin a ni a, kuminah chuan ni hnih hman a ni a, hnam lam chi hrang hrang, hnam incheina leh hnam infiamna te entir niin, zaithiamte nen hun hman a ni.

<><><>

CM

Chief Minister Pu Lalduhoma'n khaw thal chho zelah mi tin te fimkhur turin a chah a, In leh ram lama kangmei chhuak thei reng anih avangin mi tin fimkhur tura chahin lui kal te pawh fimkhur a ngaih thu social media kaltlangin a sawi.

Sawrkar chuan kumina lo hal tur te chuan March ni 15 hma in hal vek tur anih thu alo chhuah tawh a, hmunhpiah hmun neite tan March ni 31 thleng lo hal hun hawn niin Lo hal tur ten lo hal hma in mei kawng tha taka sial vek tura tih an ni a, ram tikanglo tura mi tin te inveng tura chah in ramhnuaih meizial bung paih leh meichhem lo turin a hriattir a, Kangmei laka him theih nan in leh a vel tifai tha in awlsam taka kang thei petrol leh diesel lakah fimkhur turin thu a chhuah bawk.

<><><>

CS

Chief Secy Khilli Ram Meena an Mamit tlawhin, Department hrang hrang official-te a kawm a.

Mamit District chhunga hmasawnna hna kalmekte chu tha taka a kal theih nan theihtawpchuaha ngaihtuahna tak tak seng turin a chah a, Mamit District dinhmun tha zawka ding tura tanrual a ngaih thu leh mipuite hnen thleng phak ngeia mahni line theuha taima taka hnathawk turin kalkhawmte a chah a ni.

District Bawrhsap Pu K. Laltlawmlova chuan Mamit District dinhmun tarlangin Mamit District chhungah mihring nuai 1 & 1290 an awm a, a zauzawng hi sq m 3025 a ni. Chenna in sing 2 & 902 awmin literacy rate hi zaa 84.93 a ni tih a sawi a ni.

Chief Secretary hian 132 KV Bairabi leh W. Phaileng leh Mamit College-te a tlawh a ni.

<><><>

RNU WORKSHOP

Akashvani Aizawl Regional News Unit buatsaih Mizo tawnga chanchinharziak leh chhiar dan zirhona chu vawiin khan Aizawla Akashvani Aizawl Multipurpose Hall ah hman a ni.

Vawiin hun hi Akashvani Aizawl Director leh Mizoram Cluster Head Pu DR Lalropuia chuan a hman pui a, Radio hmanga chanchinhar puan chhuah kawngah hmasawnna tur tam tak a awm tih sawiin thawktute chu hma lam pan tuma theihtawp chhuah theuh turin a sawm a ni.

(BYTE)

Vawiina hun hmanah hian pawn lam atanga mithiam Pu Rozama Chawngthu, Synod Higher Secondary School Principal hlui leh Dr H. Laldinmawia, Asst Professor, Pachhunga University College bakah hun rei tak chhung Radio news puangtu Pi Lalramliani Hnamte ten kalkhawmte an zirtir a ni.

Vawiin hun hi Regional News Unit Head Pu Gin Gangte, Asst Director (News) chuan tel puiin Akashvani-a thawktu hrang hrang te an tel bawk.

<><><>

AIR NEWS ON SOCIAL MEDIA

Chanchinhar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinhar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinhar puan leh a ni ang.

<><><>

TB

National TB Elimination Programme hnuaiia ram pum huap ni 100 chhung TB natna do beihpui thlakna, 100 days campaign kalpui mekah Mizoroma mi 23321 endik tawh zingah TB vei mi 31 hmuhchhuak an ni.

National TB Elimination Programme hotuten Akashvani an hrilh danin ni 100 campaign hi nikum December ni 7 atanga kumin February ni 27 thleng neih a ni a. Mizoram chhunga district 4 Aizawl, Mamit, Champhai leh Serchhip district ah te neih a ni a. Aizawl district-a mi 10562 endik zingah TB vei mi 18 hmuhchhuah a ni a, Champhai district-a 5476 endik zingah 4, Mamit district a 3086 endik zingah TB vei mi 9 hmuhchhuah an ni.

Nikum chhung khan TB natna avang hian Aizawl district ah nunna chan mi 269 an awm a, Champhai district ah 27, Mamit district ah 12 leh Serchhip district ah 7 an awm a ni.

<><><>

MLP ACT 2019

Mizoram Liquor Prohibition Act hnuaiyah January thla chhung khan zu zuar mi 504 man an ni a, hemi kaihhnawihah hian zu thahnem tak man niin zu rui mi 60 man an ni bawk.

Excise and Narcotics Department thuchhuah tarlan danin kumin January thla khan zu zuar mi 483 an man a, Police lamin mi 21 man in an man belkhawm hi mi 504 an ni a, hemi kaihhnawihah hian zu thahnem tak man niin January thla chhung vek hian Excise Department in zu rui mi 38 an man a, Police lamin mi 22 an man bawk a ni.

Thuchhuah tarlan danin MLP Act 2019 hnuaiah Rakzu tam tham tak man niin litre sang 6 chuang man a ni a, zu bilh lai tin 2216 man niin Dawidim kg 52.8 man a ni a, sap zu bottle sanghnih zasarih chuang man niin beer leh wine hrang hrang pawh man a ni a, zu sahna bel 93 pawh man telin heng zu kaihhnawihah hian Excise in motor 7 an man a, Police in 3 man in a vaia motor man belkhawm hi 10 a ni.

<><><>

REVIEW ON MANIPUR SITUATION

Union Home Minister Amit Shah hovin sorkar mipawimawh-ten Manipur boruak thlirlet a ni a, March ni 8 atangin state chhung inkalpawhna kawng zawng, mipui tana zalen taka hawng turin a hriattir a ni.

New Delhi-a thutkhawm neihah hian Manipur larsap, Ajay Kumar Bhalla pawh a tel a, Pu Shah-a chuan kawng siam hna tibuaia zawnga chete lakah khauh taka dan lekkawh turin a hriattir a, Manipur-in ramdang nena ramri an intawm hung hna thawh mek chu a hma thei ang bera zo turin a hriattir bawk.

Thutkhawmah hian Home Secy Govind Mohan, Intelligence Bureau Director, Tapan Kumar Deka leh mipawimawh dangte an tel a, tun hi thla kaltaa Manipur-a President's Rule puan anih hnuaah Manipur chungchanga thutkhawm neih vawi khatna a ni.

<><><>

UTTARAKHAND AVALANCHE

Uttarakhand Chamoli dist-ah nimin khan vur tawlhin Mana khuaa Border Roads Organisation (BRO) hnuaia thawktute awmna camp a hnawl a, hriat theih chinah mi 4 an thi a, mi 50, him taka chhanchhuah an ni a, midang 5 chin hriat lohva awmte zawn hna, ngawrh taka thawh zui zel a ni bawk.

Uttarakhand Chief Minister Pushkar Singh Dhami-a'n vawiin khan helicopter atangin vanduaina thlenna hmun a fang a, sipai leh sorkar hotute bakah chhanchhuah hna thawktu agency hrang hrangte a kawm bawk. Prime Minister Narendra Modi-a pawhin Chief Minister Dhami-a hi telephone-a bia-in chhanchhuah leh chhawmdawl hna thawh kawngah sorkar laipuiin a tul angin a pui zel ang tih a hrilh a ni.

<><><>